

Caras commembras, stimai commembers

Ei para che miu lamentem e far da pauper a caschun dalla radunonza generala digl onn vargau, tgei che pertucca vies anim da separticipar allas sentupadas, ha purtau fretgs. Ei vossa partecipaziun allas sentupadas el 2022 stada veramein fetg mediochera, han las sentupadas dil 2023 para tucchau pli fetg vies gust, haveis priu part en roschas, tgei ch'ei tonaton legreivel. Ei sa naturalmein era esser, che la pandemia da corona ha giugau empauet ina rolla che vus haveis giu certas retenientschas da sentupar el 2022 en gruppas pli grondas. Eventualmein ha la suprastonza era buca tucchau vies gust cun il program offeriu. Seigi sco ei vegli, igl onn vargau havein nus perencunter propi astgau passentar biaras bialas uras en buna cumpagnia rumantscha. In cuort sguard anavos giudlunder fetgel alla radunonza generala ch'ei gest sin rucca. Entginas fotos, era da sentupadas dils davos onns, anfleis vinavon sin nossa pagina d'internet www.reziabassa.ch.

Il concert da primavera, il cant a caschun dalla pardanonza a Cumbel e duront in survetsch divin a Maiavilla, in pign schatg musical a Walenstadt ed il cant alla sepultura da nies car concantatur e commember Baseli a Näfels, era nies chor ei staus pulit activs igl onn vargau. Buca sulet ils auditurs da nies concert da primavera a Ragaz Bogn, na era ils habitonts dalla bellezza Lumnezia han schau plascher fetg bein il cantinem dils rumantschs ord la diaspora. Senz'auter vala quei era per ils intermezzos a Maiavilla, Walenstadt e Näfels. In grond engraziament sauda en quei connex a nossa zun premurada dirigenta Monika Arpagaus e secapescha era al vicedirigent Hans Fäh.

Ils proxims concerts dil chor maschadà rumantsch Rezia Bassa ein era gia terminai. Il chor concertescha, ensemblamein cun il chor dils Larischs e la musica populara "Trintett", ils 28 d'avrel 2024 allas 17.00 uras ella baselgia reformada a Ragaz Bogn. Ina jamna pli tard, ils 5 da matg allas 17.00 uras suonda il secund concert, lu en la baselgia Comander a Cuera, lezza gada sulettamein cun ils dus chors. Prendei cun tuts tgi che vus saveis e visitei specialmein il concert a Ragaz Bogn, il chor havess grond plascher.

Jeu saiel buc, forsa schai ei vid'il charme dil president ni siu inschign d'animar la gliעד, en mintga cass pro-

sperescha nossa uniun puspei sco els megliers onns. Dapi la radunonza generala 2023 astga l'uniun beneventar biabein 40 commembras e commembers novs e dumbra cun il di dad oz actualmein bunamein 130 dels, tgei ch'ei grondius. Ina fetg gronda sfida vegn senz' auter ad esser da puder mantener quei diember era el futur, vul dir, nus stuein esser vinavon fetg activs e plidar vinavon rumantschas e rumantschs el intschesch dall'uniun dad era far part a tala. Cheu essas era vus clamai da segidar, las experientschas muossan numnadamein che quei funcziunescha il meglier entras il contact persunal!

Ussa lein aunc dar in cuort sguard el 2024 e sin las sentupadas ch'ei sin rucca uonn. Sper ils termins fixai gia ussa, sco per exempel il lotto, la sera da heighels, la viandada sil Lanaberg, ed il cant liber, vegn la suprastonza vinavon ad organisar occurenzas spontanias sco il café rumantsch ed aschia vinavon. Vus vegnis senz' auter informai ad uras sur da tals eveniments, quei persunalmein per e-mail ni WhatsApp ed era sin nossa pagina d'internet.

Ils cafés rumantschs anflan mintgamai fetg buna resonanza, quei ei semussau gia igl onn vargau e para da continuar era egl onn niev. Als cafés dil schaner e fevrer 2024 a Mels ha mintgagada ina biala roschada da varga 20 persunas priu part, ils proxims han lu liug a Landquart ed a Buchs e silsunter puspei a Mels.

Ord ina luna stuorna ha il president priu avon d'organisar in cuors da romontsch, quei cun l'intenziun ch'era nossas commembras e nos commembers da lieunga tudestga hagian la caschun d'emprender nies bi lungatg. Igl ei nuota stau sempel da metter entuorn quella idea, specialmein la tscherca dad ina persuna d'instrucziun ei stada fetg intensiva. Cun dumandar suenter tier Pieder e Paul vaiel lu anflau, cun il Vitus Dermont da Laax, in scolast adattau ch'ei era prompts da menar il cuors. La bunaveglia d'emprender romontsch ei para fetg gronda e plascheivla, quintau vevel cun rodund 10 annunzias, la finfinala han 33 persunas scret en per il cuors, vul dir, ei ha schizun giu num d'organisar in secund, aschi surpridents ei igl interess staus.

Il 2024 sto la suprastonza vegnir elegida da niev, quei per ils proxims 3 onns. Deplorablamein han Lea Killias

e Lucas Caviezel demissiunau sin la radunonza generala 2024. La Lea ei stada 6 onns actua, il Lucas ha prestau 11 onns buna lavur sco revisur da quen. A domisdus sauda in grond engraziament per lur engaschi els davos onns.

La suprastonza propona a vus, caras commembras e preziai commembers, suandontas persunas sco suprastontas, sco suprastonts per ils proxims 3 onns:

President: Rinaldo Caduff (dapi 2018)

Vicepresidenta: Fidelia Staub (dapi 2021)

Cassier: Sandro Caduff (dapi 2021)

Assessura: Carin Deplazes (dapi 2021)

Revisura da quen: Andrea Dellner (dapi 2021)

Revisura da quen: Lea Killias (nova)

Vacants ei tochen ussa aunc il post d'actuar/actua, cheu sperein nus fermamein sin vies agid e sin vossas annunzias ni propostas! El cass che negin ei promts da surprendre igl actuaritad, sorprendess denton eventualmein pli bugen il post da cassier, ei il cassier proponius Sandro Caduff plascheivlamein promts da surprendre il post d'actuar.

Secapescha haveis vus vinavon il dretg da proponer ulteriuras persunas per la suprastonza, fagei quei, per plascher, tochen ils 10 da mars 2024 al president.

Caras commembras, preziai commembers, cun in grond engraziament a vus tuts per vies engaschi en favur da nossa uniun e vossa numerosa preschientscha allas sentupadas, lessel finir miu pareri 2024. Quei lessel denton buca far senza in special "Dieus paghi" e buca sulettamein mo a mias consuprastontas ed al consuprastont, als revisurs da quen, alla dirigenta, al vicedirigent ed alla cummissiun dil chor, mobein era a dus che han negina incarica ufficiala, prestan denton fetg buna e gronda lavur per l'uniun, numnadamein la Elisabeth Caduff ed il Meinrad Arpagaus.

Jeu selubeschel da pretender che mintga commembra, mintga commember ha grond plascher dalla carta sin il di da natalezi ch'els survegnan dalla Elisabeth. Notabene ina carta ch'ella creescha mintgamai senza cun bia fantasia ed engaschi e quei mintga onn per, tochen da cheu varga 90, e naven dad uonn schizun per biabein 130 commembras e commembers!

Fetg engrazievels essan era al Meinrad, el procura stedi che las mappas da cant dil chor ein adina a jour, segida cun la dirigenta nua ch'el sa e baghegia, sch'ei fa da basegns, schizun tribunus per ils concerts dil chor.

En quei senn, ad in bien seveser allas proximas sentupadas rumantschas, e naturalmein era allas occurenzas da nies chor. Jeu sperel e selegrel fetg sin vossa stedia participaziun! Dil reminet, era propostas da vossa vart per occurenzas ein fetg tschercadas!

Mols, il fevrer 2024, vies president

Rinaldo Caduff